


संक्षिप्त

गृह - विनय



चवम्ह

दुण्ड बहादुर वज्राचार्य

गावहाल, यल ।

Dhamma Digital

पिकाम्ह

यज्ञराज वज्राचार्य

डौबहाल, यल ।

संक्षिप्त

गृह - विनय

चवम्ह

मुण्ड बहादुर वज्राचार्य

गावहाल, यल ।

Dhamma Digital

पिकाम्ह

यज्ञराज वज्राचार्य

डोबहाल, यल ।

“वन्दामि चेतियं सब्बं, सब्बठानेसु पटिट्ठितं ।
सारीरिक धातु महाबोधि, बुद्धरूपं सकलं सदा ।”

बुद्धवचन त्रिपिटकया छगू महत्वपूर्ण ग्रन्थ दीघ-
निकाय यागु छपु सूत्रया आधारय सरल भाषां हनेबहम्ह
दुण्ड बहादुर दाई नं च्वया बिज्यागु प्रत्येक व्यक्तिया
परिवार्षिपित ज्या लगे जूगु थुगु पुस्तिका जिमि दिवंगत जुया
बिज्याम्ह बौ सन्तमान वज्राचार्यया निर्ति निर्वाण कामना
यासे ललितपुर नगरया सकल स्थूप, चैत्य, विहार, मन्दिर
आदि स्थित भगवान् बुद्धयात पूजा भाव याना मतयाःया
दिनय् छायागु जुल । थुगु पुण्यया प्रभावं जिमि बौ प्रमुख
सकल प्राणीपित याकनं निर्वाण प्राप्तिया निर्ति हेतु जुइमा
घका आशिका याना ।

“सब्बदानं धम्मदानं जिनाति”

ने. सं॥ १११० मतयाः

२०४७-४-२४

— यज्ञराज



जिमि स्वर्गीय बौ सन्तमान वज्राचार्य

जन्म - वि. सं. १९७४ फागुन पूर्णिमा

मृत्यु - वि. सं. २०४६ भाद्र शुक्ल चतुर्दशी

नमो तस्स भगवतो अरहतो सम्मासम्बुद्धस्स ।

संक्षिप्त

गृह-विनय

एक भगवान् राजगृहया वेणुवनय् च्वना विज्याना च्वन । उगु समयय् सिंगाल गृहपतिपुत्र इलय् दना राजगृहं पिहाँ वया प्याःगु वसतं पुना प्याःक सँ तया ल्हाः विन्ति याना नाना दिशा नमस्कार याना च्वन, गथेकि—पूर्वदिशा, दक्षिण-दिशा, पश्चिमदिशा, उत्तरदिशा, क्वय्यागु दिशा व च्वय्यागु दिशा ।

एन्हु भगवान् राजगृहय् भिक्षाटनया निंति विज्याना च्वंबले भगवानं सिंगाल गृहपतिपुत्रयात थुकथं नमस्कार याना च्वंगु खना थथे आज्ञा जुया विज्यात—‘गृहपतिपुत्र ! छाय् छं इलय् हे दना राजगृहं पिहाँ वया प्याःगु वसतं पुना प्याःक सँ तया ल्हाः विन्ति याना नाना दिशा नमस्कार याना च्वनागु ?

“भन्ते ! जिमि बौ सिइ त्यंगु बखतय् जित थथे धयादीगु खः—‘बाबु ! दिशा नमस्कार या ।’ भन्ते ! उकिं हे जिं बौयागु खँ न्यना नमस्कार याना च्वनागु खः ।

“गृहपतिपुत्र ! आर्यं विनयय् थुकथं खुगू दिशा नमस्कार याइ मखु ।”

“भन्ते ! भगवानं आर्यं विनयय् गुकथं नमस्कार याये माःगु खः उकथं जित धर्मोपदेश याना बिज्याहुँ ।”

“गृहपतिपुत्र ! थन आर्यश्रावकया (क) प्यता प्रकार-या कर्म क्लेश तोतूगु जुइ, (ख) प्यंगू कारणं पाप कर्म याइ मखु व (ग) खुता प्रकारया भोग विलासयागु अपायसुख (कारण) यात सेवन याइ मखु—थुकथं क्खिप्यता प्रकारया पाप जुइगु कर्म अलग जुया खुगू दिशायात नमस्कार याना निगू लौकियागु विजय यायेत लगे जूगु जुइ । अनलि वयागु थुमु लोक नं सन्तीषजनक जुइ, परलोक नं सन्तीषजनक जुइ । अनलि व शरीर तोता सिइ धुंका सुगति स्वर्गलोक्य उत्पन्न जुइ ।

(क) छु छु प्यता कर्मक्लेश तोतूगु दयेमाः ? गृहपति-पुत्र ! प्राणी हिंसा कर्मक्लेश, अदिन्नादान (खुया कायेगु) कर्मक्लेश, काम मिथ्याचार कर्मक्लेश, मृषावाद कर्मक्लेश—थुपि प्यता कर्मक्लेश तोतूगु दयेमाः ।

(ख) छु छु प्यता कारणं पाप कर्म मयायेमाः ? गुलिसिनं छन्द (=इच्छा) या गती वना पाप कर्म याइ, द्वेषया गती वना पाप कर्म याइ, मोहया गती वना पाप कर्म याइ, भयया गती वना पाप कर्म याइ । गृहपतिपुत्र ! परन्तु आर्यश्रावक न छन्दागती वनी न द्वेषागती वनी न मोहागती

वनी न भयागती हे वनी । उकि हे (आर्यश्रावकं) थुपि प्यता कारणं पाप कर्म याइ मखु ।

(ग) छु छु खुता भोग विनाशया कारणयात सेवन मयायेमाः ? गृहपतिपुत्र ! सुरामेरय मदच प्रमाद स्थानय् लगे जुइगु भोग विनाशया कारण खः । कुवेलाय् लँय् चाह्यु जुइगु भोग विनाशया कारण खः । प्याखँ तमासा स्वजुइगु बानी भोग विनाशया कारण खः । जूम्हितेगु आदि प्रमादया कारण भोग विनाशया कारण खः । मभिम्ह पासा नाप जुइगु भोग विनाशया कारण खः । अलसी व अनुद्योगी जुया च्वनेगु भोग विनाशया कारण खः ।

सुरामेरय मदच प्रमाद स्थानय् लगे जूपिनि थ्व खुता दोष दइ—(१) थनया थनसं धन हानी जुइ, (२) कलह बढे जुइ, (३) रोगया छेँ जुइ, (४) अकीर्ति उत्पन्न जुइ, (५) लज्जा नाश जुइ व (६) प्रज्ञायात कमजोर याइ ।

कुवेलाय् लँय् चाहिलिगु बानी दुपिनि खुता दोष दइ—(१) स्वयं थः रक्षा (गोप्य) व सुरक्षित जुइ मखु, (२) वया काय् कलापि नं रक्षा व सुरक्षित जुइ मखु, (३) वयागु धन सम्पत्ति नं रक्षा व सुरक्षित जुइ मखु, (४) मखुगु खँय् शंका याइ, (५) वयात मखुगु खँ पाः याइ व (६) आपालं दुःख भागी जुइ माली ।

प्याखँ तमासा स्वयेगुली खुता दोष दइ—(१) गन प्याखँ दु ? (२) गन म्ये दु ? (३) गन बाजं दु ? (४) गन

अने अनेगु खँ कना च्वंगु दु ? (५) गन लापाः थाःगु सः दु ?
व (६) गन कुम्भथूण (बाजाया सः) दु ? धका स्वजुइ
माली ।

जू म्हितेगु प्रमादया कारण दुपिनि थ्व खुता दोष दइ—
(१) त्यायेवं वैरी दइ, (२) बुइवं धनया कारणय् शोक जुइ,
(३) थनया थनस धन हानी जुइ, (४) गनं सभाय् वनीबले
वयागु खँय् पत्याः याइ मखु, (५) मित्र अमात्यपिसं साथ
विइ मखु व (६) आवाह विवाह याइपिसं—‘थुम्ह मनू जुवाद्यो
खः थ्वं काय् कलापि पालन याये फइ मखु’ धका म्हाय्मचा
कालबिल याइ मखु ।

मभिपि पासापि नाप जुइपिनि खुता दोष दइ—
(१) गुम्ह जुवाद्यो खः, (२) गुम्ह रण्डिवाजी याइम्ह खः,
(३) गुम्ह नसालु पदार्थ सेवन याइम्ह खः, (४) गुम्ह कृतघ्न
खः, (५) गुम्ह कंग लाइम्ह छत्तु खः व (६) गुम्ह लुटे
याइम्ह खुँ, डाकु खः—थुजापि मनूत जक वया पासापि दइ ।

अलसी व अनुद्योगी जुइपिनि थ्व खुता दोष दइ—
(१) थौं तःसकं चिकु धका ज्या याइ मखु, (२) थौं तःसकं
तान्वो धका ज्या याइ मखु, (३) थौं तसकं लिवात धका ज्या
याइ मखु, (४) थौं तःसकं न्हाथ्यानी धका ज्या याइ मखु,
(५) थौं तःसकं नये पित्यात धका ज्या याइ मखु व (६)
थौं तःसकं प्वा फुं फुं मिक नयागु दु धका ज्या याइ मखु ।
याये माःगु ज्या मयासे चिइका च्वनिम्हसिया निरिति उत्पन्न

मज्जु भोग सम्पत्ति उत्पन्न जुइ मखु हानं उत्पन्न जूगु भोग सम्पत्ति नं फुना वनी ।

पासाया रूप्य् मखुम्ह पासा

थुपिं प्यथी प्रकारथापित मित्ररूपी अमित्र धका सिइकेमाः—(क) मेपिनिगु वस्तु काइम्ह (ख) केवल खँ जक सय्किम्ह (ग) केवल यइपुगु खँ जक ल्हाइम्ह व (घ) मभिंगु ज्याय् ग्वाहालि बिइम्हसित मित्रया रूप्य् अमित्र धका सिइकेमाः ।

(क) प्यता कारणया आधारय् मेपिनिगु वस्तु काइम्ह-सित मित्ररूपी अमित्र धका सिइकेमाः—(१) मेपिनिगु वस्तु काइम्ह, (२) भचा बिया आपाः काइम्ह, (३) भयया कारणय् ज्या याइम्ह व (४) थःगु स्वार्थया नितिं जक साथ बिइम्ह । थ्व हे प्यता कारणया आधारय् मेपिनिगु वस्तु काइम्हसित मित्ररूपी अमित्र धका सिइकेमाः ।

(ख) प्यता कारणया आधारय् खँ जक सय्किम्हसित मित्ररूपी अमित्र धका सिइकेमाः—(१) जुइ धुं कुगु जक खँ ल्हाइम्ह, (२) लिपाया खँ जक ल्हाइम्ह, (३) ख्यले मदुगु खँ जक ल्हाइम्ह व (४) वर्तमानयागु ज्याय् धाःसा ग्वाहालि यायेगु खँ मल्हाइम्ह । थ्व हे प्यता कारणया आधारय् खँ जक सय्किम्हसित मित्ररूपी अमित्र धका सिइकेमाः ।

(म) प्यता कारणया आधारय् केवल यइपुगु खँ जक ल्हाइम्हसित मित्ररूपी अमित्र धका सिइकेमाः—(१) मभिगु ज्याय् नं अनुमति बिइ, (२) भिगु ज्याय् नं अनुमति बिइ, (३) न्ह्योने प्रशंसा याइ व (४) ल्युने निन्दा याइ । थ्व हे प्यता कारणया आधारय् केवल यइपुगु खँ जक ल्हाइम्हसित मित्ररूपी अमित्र धका सिइकेमाः ।

(घ) प्यता कारणया आधारय् मभिगु ज्याय् ग्वाहालि याइम्हसित मित्ररूपी अमित्र धका सिइकेमाः—(१) सुरामेरय म्दय प्रमाद स्थानय् जुइगु ज्याय् सहायक जुइम्ह, (२) कुबेलाय् चाहिलेगु ज्याय् सहायक जुइम्ह, (३) प्याखँ स्ववनेगु ज्याय् सहायक जुइम्ह व (४) जू म्हितेगु प्रमादया कारण जुया च्वंगु ज्याय् सहायक जुइम्ह । थ्व हे प्यता कारणया आधारय् मभिगु ज्याय् ग्वाहालि याइम्हसित मित्ररूपी अमित्र धका सिइकेमाः ।

धात्थेंयाम्ह पासा

थुपि प्यता प्रकारया मित्रपित धात्थेंयाम्ह पासा धका सिइकेमाः—(क) उपकार याइम्ह (ख) सुख दुःखय् समान जुइम्ह (ग) हित जुइगु खँ कनिम्ह (घ) अनुकम्पा तइम्ह मित्रयात धात्थेंयाम्ह पासा धका सिइकेमाः ।

(क) प्यता कारणया आधारय् उपकार याइम्ह मित्रयात धात्थेंयाम्ह पासा खः धका सिइकेमाः—(१) प्रमाद

जूम्हसियात रक्षा याइम्ह, (२) प्रमाद जूम्हसियागु सम्पत्ति रक्षा याइम्ह, (३) ग्याम्हसियात शरण जुया विइम्ह व (४) ज्या खँ पडे जुइबले धाःगु स्वया नं निद्रुगं भोग सम्पत्ति विइम्ह । थ्व हे प्यता कारणया आधारय् उपकार याइम्ह मित्रयात धात्थेंम्ह पासा खः धका सिइकेमाः ।

(ख) प्यता कारणया आधारय् सुख दुःखय् समान जुइम्ह मित्रयात धात्थेंयाम्ह पासा खः धका सिइकेमाः— (१) वयात गोप्य खँ कने ज्यूम्ह, (२) वयागु गोप्य खँ यात गोप्य याना तइम्ह, (३) आपद विपदय् वयात तोती मखुम्ह व (४) माला वन धाःसा वयागु निरति ज्यान तक नं विइत तयारम्ह । थ्व हे प्यता कारणया आधारय् सुख दुःखय् समान जुइम्ह मित्रयात धात्थेंयाम्ह पासा खः धका सिइकेमाः ।

(ग) प्यता कारणया आधारय् हित जुइगु खँ कनिम्ह मित्रयात धात्थेंयाम्ह पासा खः धका सिइकेमाः—(१) मभिगु ज्याय् पना विइम्ह, (२) भिगु ज्याय् लगे याइम्ह, (३) मन्यनागु खँ कनिम्ह व (४) स्वर्गया लँ कना विइम्ह । थ्व हे प्यता कारणया आधारय् हित जुइगु खँ कनिम्ह मित्रयात धात्थेंयाम्ह पासा खः धका सिइकेमाः ।

(घ) प्यता कारणया आधारय् अनुकम्पा तइम्ह मित्रयात धात्थेंयाम्ह पासा खः धका सिइकेमाः—(१) स्थनिबले लय्ताइ मखुम्ह, (२) भिनिबले लय्ताइम्ह, (३) निन्दा याम्हसित रोके याइम्ह व (४) प्रशंसा याम्हसित नं प्रशंसा

[८]

याइम्ह । थ्व हे प्यता कारणया आधारय् अनुकम्पा तइम्ह मित्रयात धात्थेंयाम्ह पासा खः धका सिइकेमाः ।

खुगू दिशा नमस्कार

“गृहपतिपुत्र ! गुकथं आर्यं विनयय् खुगू दिशा नमस्कार याःगु जुइ ? गृहपतिपुत्र ! इमित खुगू दिशा धका सिइकेमाः—(१) मांबौयात पूर्वदिशा धका सिइकेमाः, (२) आचार्ययात दक्षिणदिशा धका सिइकेमाः, (३) काय् कलायात पश्चिमदिशा धका सिइकेमाः, (४) मित्र अमात्यपित उत्तरदिशा धका सिइकेमाः, (५) ज्यामि, च्योतय्त व्वय्या दिशा धका सिइकेमाः व (६) श्रमण ब्राह्मणपित च्वय्या दिशा धका सिइकेमाः ।

Dhamma.Digital

मांबौप्रति मस्तय्गु कर्तव्य

“गृहपतिपुत्र ! न्यागू प्रकारं कायं पूर्वदिशा रूपी मांबौपिनिगु सेवा टहल यायेमाः—(१) (इमिसं) जित भरणपोषण याःगु दु उकि जि नं इमित भरणपोषण याये, (२) इमिगु ज्या खँ याना बिये, (३) कुलवंशयागु रक्षा याये, (४) अंश दइगु लँय् वने व (५) सिइपि मांबौपिनि निरिति दक्षिणा दान (पुण्य) याना बिये ।

मस्त्यप्रति मांबौया कर्तव्य

“गृहपतिपुत्र ! थुपि न्यागू प्रकारं पूर्वदिशा रूपी मांबौया सेवा टहल यायेवं कायप्रति (मांबौपिसं) अनुकम्पा तइ—(१) मभिगु ज्याय् पनी, (२) भिगु ज्याय् लगे याइ, (३) शिल्प स्यना विइ, (४) योग्यम्ह मिसा नाप ह्वंका विइ व (५) इलय् अंशयागु जिम्मा विइ । गृहपतिपुत्र ! थ्व हे न्यागू प्रकारं कायं पूर्वदिशा रूपी मांबौपित सेवा टहल यायेवं थुपि न्यागू प्रकारं (मांबौपिसं) अनुकम्पा तइ । थुकथं थ्व पूर्वदिशा प्रतिच्छादित (आरक्षा) जुइ, क्षेम व अप्रतिभय नं जुइ ।

आचार्यप्रति शिष्यया कर्तव्य

“गृहपतिपुत्र ! न्यागू कारणं शिष्यं (अन्तेवासीं) दक्षिणदिशा रूपी आचार्ययागु प्रत्युपस्थान यायेमाः—(१) आसनं दना, (२) उपस्थान याना, (३) सेवा शुश्रूषा याना, (४) परिचर्या याना व (५) सत्कारपूर्वक शिल्प शास्त्र ग्रहण याना ।

शिष्यप्रति आचार्यया कर्तव्य

“गृहपतिपुत्र ! थ्व हे न्यागू कारणं शिष्यं दक्षिणदिशा रूपी आचार्ययागु प्रत्युपस्थान यायेवं न्यागू प्रकारं शिष्यप्रति

(आचार्य) अनुकम्पा तइ—(१) सुविनीत याना बांलाक स्यना बिइ, (२) बांलाक ग्रहण याकी, (३) सःगु फुक्क शिल्पया बारे स्यना बिइ, (४) मित्र अमात्यपित बांलाक प्रतिपादन याना बिइ व (५) दिशायात रक्षा याइ । गृहपतिपुत्र ! थ्व हे न्यागू प्रकारं शिष्यं दक्षिणदिशा रूपी आचार्ययागु उपस्थान यायेवं थ्व न्यागू प्रकारं शिष्यप्रति (आचार्य) अनुकम्पा तइ । थुकथं थ्व दक्षिणदिशा प्रतिच्छादित जुइ, क्षेम व अप्रतिभय नं जुइ ।

मिसाया प्रति मिजंया कर्तव्य

“गृहपतिपुत्र ! न्यागू प्रकारं मिजनं (पुरुषं) पश्चिम-दिशा रूपी मिसायात प्रत्युपस्थान यायेमाः—(१) सम्मान याना, (२) अपमान मयाना, (३) व्यभिचार मयाना, (४) ऐश्वर्य लः ल्हाना व (५) अलंकार प्रदान याना ।

मिजंप्रति मिसाया कर्तव्य

“गृहपतिपुत्र ! थ्व हे न्यागू प्रकारं मिजनं पश्चिमदिशा रूपी मिसायात प्रत्युपस्थान यायेवं थ्व हे न्यागू प्रकारं मिजंप्रति (मिसां) अनुकम्पा दइ—(१) सुसंविहितरूपं ज्याखँ याइ, (२) परिजनयात संग्रह याइ, (३) व्यभिचार याइ मखु, (४) हःगु धन संरक्षण याइ व (५) फुक्क ज्याखँय् दक्ष व

निरालसी जुइ । गृहपतिपुत्र ! थ्व हे न्यागू प्रकारं मिजनं पश्चिमदिशा रूपी मिसायात प्रत्युपस्थान यायेवं थ्व हे न्यागू प्रकारं मिजंप्रति (मिसां नं) अनुकम्पा तइ । थुकथं थ्व पश्चिमदिशा प्रतिच्छादित जुइ, क्षेम व अप्रतिभय नं जुइ ।

पासापिनि प्रति थःगु कर्तव्य

“गृहपतिपुत्र ! न्यागू प्रकारं कुलपुत्रं उत्तरदिशा रूपी मित्र अमात्ययात सेवा यायेमाः—(१) दानद्वारा, (२) प्रिय वचनद्वारा, (३) अर्थचर्याद्वारा, (४) समानताद्वारा व (५) यथार्थ खँ द्वारा ।

थःप्रति पासापिनिगु कर्तव्य

“गृहपतिपुत्र ! थ्व हे न्यागू प्रकारं कुलपुत्रं उत्तरदिशा रूपी मित्र अमात्यपित प्रत्युपस्थान यायेवं न्यागू प्रकारं कुलपुत्र-प्रति (मित्र अमात्यपिसं) अनुकम्पा तइ—(१) प्रमाद जूम्हसित रक्षा याइ, (२) प्रमादियागु सम्पत्ति रक्षा याइ, (३) भय दुम्हसियात शरण जुया विइ, (४) आपद वयेवं तोती मखु व (५) मेपिं प्रजापिसं नं सत्कार याकी । गृहपति-पुत्र ! थ्व न्यागू प्रकारं कुलपुत्रं उत्तर दिशा रूपी मित्र अमात्यपित सेवा यायेवं थ्व हे न्यागू प्रकारं कुलपुत्रप्रति (मित्र अमात्यं) अनुकम्पा तइ । थुकथं थ्व उत्तरदिशा प्रति-च्छादित जुइ, क्षेम व अप्रतिभय नं जुइ ।

ज्यामिप्रति मालिकपिनिगु कर्तव्य

“गृहपतिपुत्र ! न्यागू प्रकारं मालिकं क्वय्यागु दिशा रूपी ज्यामितयत् प्रत्युपस्थान यायेमाः—(१) यथाबल ज्याय् लगे याना, (२) नका, तलब बिया, (३) रोगी सेवाद्वारा, (४) स्वादिष्ट खाना इना नका व (५) इलय् इलय् छुट्टी बिया ।

मालिकप्रति ज्यामियागु कर्तव्य

“गृहपतिपुत्र ! श्व न्यागू प्रकारं मालिकं क्वय्यागु दिशा रूपी ज्यामितयत् प्रत्युपस्थान यायेवं न्यागू प्रकारं मालिकप्रति (ज्यामितयसं) अनुकम्पा तइ—(१) न्हापालाक दनी, (२) लिपा जक दचनी, (३) ब्यूगु (जक) काइपि जुइ, (४) बांलाक ज्या याइपि जुइ व (५) मालिकपिनि प्रशंसक जुइ । गृहपतिपुत्र ! श्व न्यागू प्रकारं मालिकं क्वय्यागु दिशा रूपी ज्यामितयत् प्रत्युपस्थान यायेवं श्व हे न्यागू प्रकारं मालिकप्रति (ज्यामितयसं) अनुकम्पा तइ । थुकथं श्व क्वय्यागु दिशा रूपी प्रतिच्छादित जुइ, क्षेम व अप्रतिभय नं जुइ ।

श्रमण-ब्राह्मणप्रति कर्तव्य

“गृहपतिपुत्र ! न्यागू प्रकारं कुलपुत्रं च्वय्यागु दिशा रूपी श्रमण-ब्राह्मणपित प्रत्युपस्थान यायेमाः—(१) मैत्री

कायकर्मद्वारा, (२) मैत्री वचीकर्मद्वारा, (३) मैत्री मन-कर्म-
द्वारा, (४) (इमित) लोखा चायेका बिया व (५) आमिष
(भोजन) प्रदान याना ।

कुलपुत्रप्रति श्रमण-ब्राह्मणपिनिगु कर्तव्य

“गृहपतिपुत्र ! थ्व न्यागू प्रकारं कुलपुत्रं च्वय्यागु
दिशा रूपी श्रमण-ब्राह्मणपित प्रत्युपस्थान यायेवं खुगू प्रकारं
कुलपुत्रप्रति (श्रमण ब्राह्मणपिसं) अनुकम्पा तइ—(१) मभिगु
ज्यां हटे याइ, (२) भिगु ज्याय् लगे याइ, (३) भिगु विचारं
अनुकम्पा तइ, (४) मन्यनागु खँ न्यंकी, (५) न्यनागु
खँयात क्वातुका विइ व (६) स्वर्गयागु लँ नं वयना विइ ।
गृहपतिपुत्र ! थ्व न्यागू प्रकारं कुलपुत्रं च्वय्यागु दिशा रूपी
श्रमण-ब्राह्मणपित उपस्थान यायेवं थ्व हे खुगू प्रकारं कुलपुत्र-
प्रति (श्रमण-ब्राह्मणपिसं) अनुकम्पा तइ । थुकथं थ्व च्वय्यागु
दिशा प्रतिच्छादित जुइ, क्षेम व अप्रतिभय नं जुइ ।